

本朝分省人物考

人物考卷之十五目錄

南直隸鳳陽府

二

郭英

花雲

濮真

吳良

吳禎

郭子興

丁德興

馮國用

附弟國勝

胡大海

謝彥

孫巖

甯正

單安仁

郁新

王濂

唐鐸

李敏

沐春

李默

王彌

耿璫

李芳

卜謙

本朝京省人物考卷之十五

南直隸鳳陽府二

郭英

郭英臨淮人沉毅多智膂力過人尤精騎射年十八從太祖起義兵甚見親信每令直宿帳中取徐泗滁和采石等處屢立戰功上嘗以郭四呼之上親征僞漢大戰鄱湖英時金瘡未瘳力疾鏖戰敗賊於禁江口已而友諒中流矢死有言英之功者上問之英曰天威神算臣何力焉上益重之時友諒子理復立於武昌進軍攻之其將陳僉同者驍捷善

梁馳入中軍 上遽呼英曰郭四爲吾殺賊英持鎗  
躍馬奮臂一呼賊應手隕墜 上解所御赤戰袍衣  
之曰汝唐之尉遲敬德也授驍騎衛管軍千戶從征  
襄陽克淮鳳等郡陞指揮僉事洪武元年從大將軍  
北定中原所至有功初大將軍遣取通州英距城三  
十里爲營深溝高壘爲持久計衆請速攻之曰吾師  
遠來敵以逸待勞攻城非我利也宜出其不意破之  
翼日大霧英以千人伏道旁率精騎三千直抵城下  
元帥率敢死士萬餘張兩掖而出與戰良久英佯敗  
彼乘勝來追伏兵中起截爲兩道遂克通州復從常

開平取太原守將王保保軍於城西英憑高望之譏  
常公曰彼兵多而不整營大而無備請夜劫之常深  
然其計是夜英率十餘騎潛入其營舉火鳴砲伏兵  
亦舉火砲而常以兵繼之敵兵大潰自相屠戮乃棄  
城以遁已下興州大同至西安鳳翔追敗賊將賀宗  
哲於亂山庚戌陞都指揮使鎮守河南 皇寧妃英  
女弟也 上遣至英第餞之賜白金二十罌廐馬二  
十匹時河洛新罹兵燹邑井蕭條居民艱食盜賊充  
斥英宣布威德綏輯流亡申寬條明賞罰遠邇來歸  
者日以千計未期年戶口倍增境內大治丙辰移鎮

北平河南之民孳老携幼遮馬前數十里不得行北平初定羣胡反側不寧英開示誠款諭以理亂禍福人心遂安元左丞何允中等聞其德來降者凡九千餘人逾四年召還京進大都督府僉事更定官制改前軍都督府僉事辛酉從傅友德征雲南英與陳桓胡海分道進討道多險隘諸將欲深入英曰破敵貴先聲攻取必自近始舍近趨遠豈策之上耶遂先攻赤水河時久雨河水暴漲下令諸軍砍木爲筏夜半濟河北曉賊始覺遂大潰由是雲南諸賊破膽進攻曲靖至江川先遣騎兵五千攻其前賊空寨迎戰復

以精騎數百擣其後斬門而入火砲連發賊亂悉破  
滅之進攻大理靖寧州蠻寨一日夜悉破之雲南諸  
路平論功進爵武定侯食祿二千五百石予誥券世  
襲丁卯同大將軍宋國公討北虜納哈出降之師旋  
虜將追襲之英與戰創傷左脇箭復中右脇英佯呼  
虜傷吾甲我衆益奮連戰數十合虜遂却進征虜右  
將軍鎮守遼東戊辰出討北虜至捕魚兒海邏騎偵  
虜營不遠英令諸軍少憩飲馬銜枚卷甲倍道而馳  
直抵虜營虜王率十餘騎潰圍出將蠻子太尉來拒  
英手刃獲兩營所積金寶珍玩圖書降其衆五萬餘

人生擒虜將四萬餘人師還賜白金千兩鈔八百錠  
綵幣四十疋已已 上以天下無事且憫其老厚加  
賜賚遣歸其鄉庚午復 召還京賜坐與語歡甚命  
統禁軍及在京諸軍辛未以虜酋寇邊 命英討之  
獲其人口孳畜逐至寒鴉山而還丁丑川陝寇發勢  
張甚 上顧曰非卿無能勝其任者授征西將軍印  
討之至汚生擒賊首高福興及黨四千餘人疏其同  
謀者請誅之脇從者乞勿治且言有司不恤民宜正  
其罪 上皆從之旋師歸里以永樂元年卒於里第  
享年六十有九訃聞遣官致祭賻卹有加贈營國公

謚威襄

花雲

花雲懷遠人少孤隨母嫁張氏貌偉而黑驍勇絕人  
儕輩畏服之歲癸巳杖劔謁上於臨濠上奇其  
材力俾將兵略地所至輒克破懷遠城口虜其帥以  
歸進攻全椒拔之羣寇據繆家寨雲俟夜襲之寇散  
走上將取滁州單騎前行遇賊數千人於道拔劔  
躍馬衝其陣而過賊驚曰此黑將軍勇甚不可與爭  
鋒兵旣至遂克滁州甲午從上取和州得卒三百  
以功授管勾明年乙未率所部先渡江上克太平

以雲忠勇可信任任命宿衛左右丙申 上破集慶雲  
得兵千人陞總管徇鎮江丹陽丹徒金壇諸縣皆下  
之過馬馱沙刷盜數百遮道索戰雲且行且鬪三日  
夜皆禽殺之授前部先鋒攻常州拔其城駐守牛塘  
管夏六月立行樞密院於太平遂拜雲院判加安遠  
大將軍丁酉春正月克常熟獲卒萬餘命雲將之秋  
七月以兵三千之寧國陷山澤中八日羣盜相結梗  
道雲操矛鼓譟出入營壘間斬首千百計而身不中  
一矢還命守太平後四年僞漢主陳友諒以舟師入  
寇圍太平雲率麾下三十餘人結陣迎戰三日賊不

得入乙亥城中乏食雲士馬憊甚城陷賊縛雲急雲怒奮身大呼縛盡解起奪守者刀殺五六人罵曰虜非吾主敵也曷不趣降賊怒碎其首縛於舟檣衆射之雲忿激罵賊不少變至死聲猶壯時年三十有九夫人郃氏方雲與僞漢戰時子煒僅三歲夫人以牲酒祭家廟會家人泣曰今城且破吾夫忠義人必以身死之吾夫死吾必不獨生然不可使花氏無後嬰兒在若等善撫育之聞雲就擒夫人赴水死年甫三十有五侍兒孫氏瘞夫人屍遂抱兒以行僞漢軍虜之至九江軍中惡養小兒孫氏以兒授漁家屬之曰

此兒良宜善視之是年冬王師伐僞漢漢敗孫氏至  
漁家視兒在閭漁人出竊負以走夜藏幽穴中天曙  
脫簪僦舟渡江遇債軍奪舟棄江中適有斷木浮至  
附之人葦洲採蓮實哺兒七日不死夜半聞人語聲  
呼之逢老父號雷老告之故與俱行明年春達上  
所孫氏泣抱兒拜上上亦泣寘兒於膝曰此將種  
也賜雷老衣遣之復其徭已而令人追之忽不見兒  
八歲侍皇太子就學年十三授虎賁右衛副千戶  
後七年陞指揮

樸真

濮真鳳陽人國初從舉義以忠勇被遇渡江取姑孰  
定建康拔維揚下毘陵克宣歙池婺諸州平江西湖  
廣諸郡收平閩浙征進中原河洛關陝皆有功歷陞  
都督僉事洪武初征高麗兵敗被執高麗王詰之曰  
汝無故而加兵吾境亦有說乎真曰我主上神文  
聖武撫有華夷一視同仁爾國叛服不常數遣使諭  
意爾不奉若上旨故始命將聲討豈爲無故能悔  
過效順庶幾轉禍爲福王愛其驍勇徐曰吾欲用爾  
爲將亦不失富貴何如真厲色曰爲天朝大臣視  
爾夷君猶若下風敢以此望我耶王怒欲兵之真乃

罵曰夷虜爾害吾吾主必滅爾國爾不知吾大丈夫有赤心肯爾屈耶卽剖心以示之而死王初意止欲迫脇真不虞真之死也真死王大懼遣人入朝謝罪併歸真從行兵士上曰濮真當危難秉義不屈忠節可嘉追贈樂浪公謚忠義表其門曰班超羣將志邁雄師時真子璵生甫數月卽襁褓中封西涼侯

吳良

吳良定遠縣人初名國興後賜今名氣岸雄偉性質剛直與弟頑俱以勇力稱元末羣雄並起海內鼎沸高皇帝以聰明聖武仗大義奮起布衣良兄弟委

身相從服勤左右 上深器焉甲午秋從 上取滁  
州乙未春從克河陽常爲先驅戰皆有功六月從渡  
大江與元兵戰於采石拔其營乘勝克姑孰尋下溧  
水溧陽丙申從定建康戰功爲多又從大將軍徐達  
克鎮江下常州屢著功勳丁酉下江陰命良以指揮  
使領兵鎮守時僞吳張士誠據姑蘇跨有淮東浙右  
地大物衆兵食富強而江陰正當東南要衝喉襟之  
地士誠又多變詐動以金帛啗誘將士良行 上諭  
之曰彼以其詐我以吾誠爾爲邊將鎮守封疆約束  
士卒毋外交毋納逋逃毋逐小利毋與爭鋒惟保境

安民而已禎奉命惟謹繕城池遠斥堠利器械嚴部  
伍士卒無敢逃亡無敢出境生事者敵亦畏其威不  
敢侵犯數年 上親將兵下江西克湖廣僞漢陳友  
諒大軍屢出而無東顧之憂皆以良之捍蔽也丁未  
大軍克姑蘇 上以姑蘇承士誠割據之餘力戰乃  
服必得剛毅有智略者鎮其地遂以命良至則奉宣  
德意紀律嚴明號令整肅軍民輯睦咸得奠安洪武  
三年天下大定論功行賞封江陰侯食祿二千五百  
石賜以鐵券子孫世襲廣西右江諸州僻處炎徼夷  
俗狃於仇殺數侵盜邊境五年春命將兵討之良跋

履崇山剪薙荆棘衝冒瘴露勤勞特甚數月盡平其地  
上封齊王於青州命良營建王府良經營區畫  
部署軍卒並手偕作功成而民不知勞留青州二載  
得疾而薨享年五十有八

吳禎

吳禎字幹臣定遠人自少時已卓犖有膽略及天下  
大亂從上起兵里中卽知天命有在與兄江陰侯  
良俱隸麾下悉心委事焉自歲甲午乙未西克滁和  
東渡大江揚威振銳所向無敵由帳前都先鋒爲總  
管陞建興翼院判尋爲天興右翼副元帥與良同守

江陰每寇至輒擊走之首破僞吳張士誠水寨擒其  
梟將朱定甲辰授武英衛指揮使丙午寇出馬馱沙  
上親督戰追至巫子門寇乘潮逆拒首尾相失禎  
縱兵急擊之俘獲無算是秋從大將軍徐達率馬步  
舟師由港口取湖州禎勒奇兵出舊館扼之戰大捷  
事平遂留戍焉吳元年丁未復從大將軍攻圍蘇州  
連破胥葑二門士誠就執奉令撫循秋毫無擾進僉  
大都督府事時方谷珍據明州未下 上以禎爲征  
南副將軍從信國公湯和往平之禎引舟乘潮夜入  
曹娥江通道夷壩出其不意直抵車廐會降者言方

氏已潛挈家入海禎領兵追於盤嶼與合戰自申至  
夜三鼓敗之盡獲其戰船人馬輜重而還未幾谷珍  
降有 旨由海洋進取福州不數日奄至城下圍其  
西南水部三門一鼓克之時僞平章陳友定據延平  
作亂明年洪武元年戊申進破延平擒友定閩海平  
會海寇聚劫蘭秀山禎調兵立勦之三年庚戌朝廷  
定功行賞進侯食祿一千五百石賜以鐵券世襲五  
年壬子詔大發兵東戍定邊禎總舟師數萬由登州  
轉運以餉之海道險遠人用藉虞禎調度有方兵食  
克羨折衝風濤如履四達尋 召還七年甲寅海上

警聞復領沿海各衛兵出至琉球大洋獲倭寇人船若干俘上京上益嘉賴之常往來海道總理軍務至是歸自遼東而疾作不起矣享年五十有二

### 郭子興

郭子興鳳陽人拳勇有膂力善騎射自癸巳歲起兵首隸郭元帥麾下明年得滁州又明年得和州從

上渡江克采石太平等處所向無敵義勇之聲日以暴著丙申三月隨大軍進拔臺城先登授管軍總管繼陞統軍元帥圍常州身犯矢石晝夜不解衣甲爲生蟻蝨九閱月城始下被賞優渥再調征宣州江陰

等郡勢劇破竹壬寅分兵之江西南昌得其全城癸卯八月進克鄱陽彭蠡之戰海艘駢進陳友諒計感中流矢死甲辰春侍上親征湖廣武昌灑血馳戰多所斬獲因屢功擢鷹揚衛指揮使復從中山王拔廬州拔安豐率先陷陣大敗姑蘇張士誠爲之奪氣其平襄陽下衡州定澧州辰州轉而蹂高郵踣淮安拔浙西湖州圍困姑蘇往往暴瘡力戰陞大都督府僉都督洪武元年有事關陝命領其軍進討中原鎮守潼關嚴戢部曲西戎羌夷兩境帖然進封鞏昌侯未幾以疾卒上賻贈有加追封陝國公謚宣武

丁德興

丁德興定遠人生有異徵驍勇善射甲午歸附上  
偉其才貌以黑丁呼之授萬戶是年取洪山寨敵兵  
勁悍且數千德興所率者纔百人一鼓破之擒其僞  
帥克滁州乙未克和州敗青山寇兵從渡江拔采石  
乘勝取太平元帥陳也先率兵數萬突犯城下上  
方策應之德興分兵從取溧水溧陽邊湖皆先登時  
蠻子海牙集船結寨采石陳也先旣敗其子兆先復  
合淮兵屯方山伺太平德興從克采石砦獲船數艘  
破方山營擒兆先攻金陵取鎮江陞管軍總管下金

璽廣德宣州領精兵圍常州平陞左翼元帥宣州復  
叛率兵佐元帥胡大海復之遂分兵下江陰取徽州  
石埭池州樅陽攻江州移兵擊安慶進攻湖州皆捷  
復援江陰攻江西旁近州縣從雙刀趙克宜興先是  
徐達邵榮攻宜興久不下議以其城西逼太湖口張  
士誠餉道所由乃與德興分兵絕太湖口而併力急  
攻城遂拔之功授鳳翔衛指揮使陳友諒犯龍江德  
興守石灰山遇戰力擊敗之是年秋從上征友諒  
擣安慶克九江從上往援安豐奮擊呂珍敗走左  
君弼引兵至復擊走之會友諒攻圍南昌從上親

征遇於康郎山死戰殲友諒遂取鄱陽十月從征陳  
理於武昌回攻廬州克之進征河南衡州多不戰而  
附擊常熟舊館敗士誠兵十一月下湖州降李伯昇  
克吳江圍蘇州將下卒於軍年四十贈都指揮使洪  
武元年二年肖像功臣廟追封濟國公德興沉勇威  
武仁而有信行師紀律嚴明不妄殺有功而不伐  
上以是重之嘗與諸將論征伐難處曰必得黑丁乃  
可其見重如此子忠授龍江衛指揮使世襲

馮國用 附弟國勝

馮國用定遠人性聰敏過目成誦喜閱孫武子窮書

夜不釋有意會處輒歎曰吾當以此佐太平取功名也甲午同弟國勝率所部謁上於鈔山上見而奇之曰爾被服若是其儒生耶問定天下計安出國用對曰金陵龍蟠虎踞帝王之都願先拔金陵而定鼎然後命將四征天下不難定也上大悅俾居帷幄贊兵政從克滁和引舟翊上渡江克采石乘勝取大平元將陳也先犯城下戰獲其全軍也先陽款附勸上勿聽後果被擒蠻子海牙與陳兆先犄角窺太平國用從攻采石寨破之俘其人船蠻子海牙僅以身遁已從上破陳兆先營擒兆先盡降其衆

擇其驍勇者五百人置麾下五百人者多疑懼不自安 上覺其意是夕遣令入衛環 上而寢獨留國用一人侍臥榻防護備至 上解甲酣寢達旦疑懼者始安進攻金陵國用率五百人先登陷陣遂拔之還軍從克鎮江大破元兵於京口遂下丹陽擊寧國以功授萬戶又克泰興宜興授大元帥守禦未幾陞帳前總制親兵都指揮使侍謀議從 上征金華克之遂下諸暨攻紹興卒年三十六 上哭之慟築壇雞鳴山祭之已肖像功臣廟位第八洪武三年冬大臣追贈郢國公子誠累有戰功仕至右軍都督

府都督弟國勝以開國功封宋國公

胡大海

胡大海字通甫虹縣人 高皇帝屯兵滁陽大海杖策謁轅門一見語合遂居前鋒乙未春二月王師取和州夏六月下太平丙申春平金陵攻京口丁酉春拔毘陵大海皆列戎行或舉旗斬將或操螯弧以先登前後屢建奇功授右翼統軍元帥使宿衛帳下夏四月又從破宣城 上命行樞密院判官鄧愈戍宣大海副之秋七月遂同諸將攻徽州拔之元將楊完聚兵十萬欲復其城大海自婺源兼程以進橫槊而

前大呼殺入衆皆披靡而遁戊戌春三月諸將克嚴州大海偕往降溪洞兵三萬以功遷行樞密院判官大海謂蘭溪去嚴爲甚邇蘭溪下則斷婺之右臂矣冬十月乃下蘭溪十有二月王師取婺州陞僉書行樞密院事益思有以自效己亥春攻陷諸暨州十有二月平處州庚子夏又拔信州信方絕糧人皆勸之還師大海曰此閩楚喉衿地也可棄之乎乃築城浚隍爲堅守計辛丑夏上憫其勞且以婺爲海右大藩通甌引越非宿將重臣控制之不可乃授大海江南等處行中書省叅知政事屯戍於婺二寅春溪洞

兵叛而大海遂遇害聞其死者莫不哀慟流涕如喪  
父母 上聞之亦震悼弗置親御翰墨作文以祭且  
命有司塑像配享卞忠貞廟庭追封越國公大海歿  
之明年其部曲與境內之民悵然遐思若不能勝乃  
相率卽城中作新廟一區十越月而廟成大海嘗自  
誦曰我不知書然吾行軍惟有三事而已不殺人不  
虜八女婦不焚人廬舍故其軍一出遠近之人皆爭  
趨附之初大海未薨嘗夜出人見其兩目煜煜有光  
若燈及其旣薨敵人數擾我邊大海降祥異或見夢  
於人或覩靈火滿野洶洶聞人馬聲泊出師輒大捷

似寔有陰兵來助者則其英魂烈爽下上於星辰之間固未嘗亡也

謝 彥

謝彥字子超鳳陽縣人幼失怙恃鞠育於外家因以孫爲氏元季兩淮兵興募集義勇圖保鄉井歲辛丑秋將兵渡江從 太祖破安慶克江州以功授義兵元帥癸卯春由安豐進攻廬州九月拔荆衡歸峽等州乙巳取通泰州甲辰春徐宿等五州并淮安三郡皆入版圖秋九月轉攻湖州十一月圍僞吳張士誠於姑蘇丁未吳元年從大將軍破姑蘇俘士誠以功

陞羽林環衛賜以良馬復從征山東克沂莒密州遂  
入青川走故元平章擴廓帖木兒洪武元年戊申正  
月太祖卽皇帝位彥駐軍東昌進階武略將軍尋  
敗元平章阿普軍取河南通務等州八月中山王奉  
詔統兵攻北平彥與在行故元順帝旣遠遁而燕薊  
等處以次悉平遂乘勝取山西大同太原二年春西  
破潼關故元平章李思齊棄輜重引兵奔鳳翔三年  
從中山王駐軍陝西取鳳翔卽追降思齊於鞏昌遂  
破臨洮延安等處慶陽守將張思道率兵拒戰凡閱  
月而師道敗走彥復從中山王還軍臨洮會故元左

丞相擴廓帖木兒來襲我軍彥率大衆亟與決戰既  
敗之於臨洮復敗之於定西橋殪其將校驅殄其士  
卒無算擴廓帖木兒引殘兵北遁四年調彥守禦處  
州陞應天指揮僉事進階宣武將軍五年移守朔州  
從征和林六年癸丑秋敗故元兵於朔州之北獲其  
將知樞密院張寶院使并其所部兵衆九年丙申進  
軍寧夏敗迺兒不花於賀蘭山收其胡兒番婦駝馬  
牛羊而還十年轉廣威將軍二十年特陞僉前軍都  
督府軍事賜綵幣萬疋黃金百兩白金百兩及甲第  
一區臧獲數十輩命彥征討雲南廣西龍里諸部二

十二年還朝賜以誥命授驃騎將軍二十三年 詔  
湖廣都司訓練官軍至貴州置新添衛二十五年更  
給新製之誥九月詔赴山西籍民丁爲軍置天成東  
勝二衛二十七年甲戌 太祖御奉天門召彥慰撫  
之眷倚甚厚特賜犀帶命復其姓爲謝氏明年以其  
季子達入覲詔除散騎逾月而選尚汝陽公主拜駙  
馬都尉有金帶玉帶襲衣鞍馬之賜長子忠復授興  
武衛指揮同知三十一年彥得疾致政家食甫二歲  
而卒享年六十有九

孫 巖

孫巖世家鳳陽幼時有術者謂其親曰是兒必貴旣長性豪爽膂力絕人輕財好義爲族里愛重元季兵興杖劔歸高皇帝於淮甸在軍中以驍勇聞乙未從渡江克采石定金陵收兩浙自是南取江廣北定中原咸與有功擢金吾左衛百戶調守鳳陽已而陞武德將軍燕山中護衛正千戶洪武庚申從太宗國於燕誠直不欺甚見親信藩國之事多委任焉乙亥引年致政而以子亨代己卯太宗舉義靖難以巖宿將知兵特起守通州是歲南兵大至城圍數周起土山臨城攻西門燬樓堞率衆極力捍禦賊賴以

完未幾兩軍合戰操戈身先士卒大呼陷陣士氣爭奮追奔逐北斬馘不可勝紀得饋運船三百餘艘貲糧無算以功陞明威將軍指揮僉事仍鎮通州辛巳兵復至攻城益急巖勵將士登城力戰矢石交下敵乃退走論功陞都指揮僉事壬午南帥平安督遼東兵十餘萬逼城巖語將佐曰彼衆我寡若城守不出自示弱也不若及其始至而擊之乃率敢死士數百犯其鋒而城上亦合勢大呼安衆大潰自是無敢復來攻者是歲六月 太宗入正大位進封應城伯歲食祿千石給誥券子孫世繼戊戌以疾卒享年八十

訥聞祭葬有加贈翼城侯謚威武

寧正

寧正字正卿壽州人少爲里中韋德成養子元末德成率兵從上克滁和二州遂渡江克太平建昌進兵擊宣州正與有功德成戰沒詔贈京兆郡侯以正襲職代領其衆從徐達克常州進階懷遠將軍攻下宣州江陰戊戌從上取婺州又從常遇春克衢州從上克江州功授民兵千戶破陳友諒兵於鄱陽湖調天策衛千戶又改雄武衛千戶從傅友德守徐州有功擢鳳翔衛指揮副使從徐達下中原取沂莒

密三州克益都濟南東昌轉下汴梁河南嵩州等處  
進克元都招降元將平章謝雲兒等八十餘人獲馬  
五百餘匹略永平擒元將平章高家奴下真定平太  
原自河中府渡河追元將孔興等進取鹿臺攻鳳翔  
逐李思齊遂下鞏昌等郡徐達令正招撫土豪趙脫  
兒孫平章等及馬鞍山迤西諸土酋洪武三年從鄧  
愈克河州留正鎮守時元鎮守卜納刺等諸酋長擁  
兵猶衆正遣兵追襲之殺獲頗多於是沙家失里與  
諸酋長遣人來請降正卽策馬往諭之酋長皆感悅  
獻其全部軍馬及元所授金玉印章金牌宣命擢臨

洮衛世襲指揮同知又招降元宣政院使何鎖南等  
尋置河州衛以正爲指揮使招來安定王帖木兒等  
暨土酋灌頂國師烏思藏諸部奉表朝貢七年改置  
南安行都指揮使司於河州以正爲都指揮使又招  
降元右丞朶兒只失結等奉置西寧等衛九年復姓  
寧氏進階龍虎將軍會川戎爲盜命衛國公鄧愈討  
之正從征有功十一年西平侯沐英征西番遣正追  
襲叛虜獲其羊馬輜重而還十二年兼領寧夏衛事  
至則修築漢唐舊渠令軍士屯田引河水灌田數萬  
餘頃兵食以足十三年從西平侯沐英征北至上林

擒元平章部衆萬餘人十四年從西平侯經略公主  
山寨殲其戍卒取全寧四部十五年除四川指揮使  
會河西土官故元左丞刺瓦等來降唯西羌未附正  
調兵討之擒賊首楊知府十九年改雲南都指揮使  
二十一年夔夷據險作亂賊將刀思郎等聚衆十餘  
萬驅象百餘拒敵正率兵從西平侯沐英進戰斬其  
二將賊衆奔潰盡獲其象馬未幾東川蠻反而越州  
龍海等山寨亦據險作亂正從西平侯沐英討平之  
二十五年沐英卒詔授正右軍都督府左都督代英  
鎮守久之命爲平羌將軍總陝西四川兵討平階文

之亂二十八年率兵從秦王往洮州等處克平番寇  
三月還京尋以疾卒 上遣官弔祭擢其子忠爲前  
軍都督府都督僉事

單安仁

單安仁鳳陽人單氏世以耒耜詩書爲業不識末俗  
侈靡事恂恂款款不以辭氣加人鄉人觀感多薰爲  
善良焉安仁少而英毅有志事功雖爲府史晝夜以  
洗寃澤物爲事當元至正江淮兵起剽斂相屠民遑  
遑無所寧居安仁奮然曰丈夫當出奇剪寇可坐視  
父母之邦淪覆耶遂椎牛釀酒率健少年與飲整部

伍嚴器械教坐作擊刺之法不一月間從之者數萬人新建壁壘橫亘三十里寇至輒曳旗鳴鼓大呼追殺俾無留行乃止退則閉柵自守老弱襁負依爲保障者累數千家當是時豪傑角立割土疆擅號令者比比而是乙未秋遂移兵廣陵以觀變且曰此輩皆爲人作驅除爾真人之興氣勢自與恒人殊丙申冬見 皇上威德日盛統六師而下金陵曰向所謂金陵真人者是已乃率部曲歸之 上大悅明年命戍鎮江嚴飭軍儲益自振厲敵兵不敢侵境居歲餘會朝廷始立提刑按察司以廉糾不虔 上選安仁爲

副使巡行浙水東悍將悍卒橫賦民糧曰寨糧務股  
判以蠹民乃一寘於法金華民有訟其邑丞受白金  
者詰之曰頗聞爾丞賢爾細氓也柰何犯分而許之  
卽圖白金短長圓方來上圖上藏棄復命諸左證圖  
之人人殊公曰是非誣耶衆環目相顧無一語遂以  
其罪抵訟者告許之風爲衰辛丑陞按察使東方肅  
清莫敢譁甲辰徵爲中書左司郎中時江淮甫定軍  
國庶務棼如亂絲乃佐太師李韓公參錯裁斷日就  
統緒事以無滯 上益奇信之吳元年丁未闕浙中  
原漸平營建城闕宮殿修朝享服御儀物廷議可任

其責者遂奏安仁爲將作卿精敏多智凡所程量皆中法不苟明年戊申是爲洪武元年上卽皇帝位陞嘉議大夫工部尚書仍領將作事二年夏改兵部宅心中正能聲彰聞年已六十有七自以精力衰孱請致其事上憫其勞從之贈田三千畝牛七十角仍給尚書半祿養其終身六年夏上念舊勲復詔中書起爲山東行省叅知政事詣闕力辭而止八年復詔加通議大夫蓋異數云

郁新

郁新字德銘臨淮縣人新姿貌環偉音吐洪暢洪武

資以才能舉用授戶部度支主事支掌內帑賜予賞  
直議論練達長於訾算奏事稱旨陞北平部郎中先  
是戶部其屬有四歲分爲十二故有是命進階奉議  
大夫二十四年超授嘉議大夫戶部右侍郎每奏事  
庭中顧問天下地理陰陽戶口漕運之數民間利害  
無巨細皆嚮應無所遺謬在廷之臣莫不以爲難而  
顧謙退自抑每事咨度其屬能者未嘗以精敏自多  
名位自高人莫不以爲難考滿超拜戶部尚書益寬  
大得體不爲瑣屑授資善大夫母喪歸葬鳳陽賓客  
至者數郡新平生慷慨急於義尊禮儒士喜交游不

爲冷熱變其態親戚有急患難不避治家有法綜理  
微密而不傷於繁故朝野皆相推重如此以永樂三  
年卒於官 上賜棺殮祭之爲素服輟朝一日士大  
夫咸以爲榮

王 濂

王濂字習古定遠人濂喜讀書知彝倫大義習爲聲  
詩音節韻趣皆有法推擇爲定遠縣吏出謀發慮皆  
中肯綮令長以賓禮遇之元季政乖豪傑並起濂拊  
髀歎曰事急矣保宗族以拯黎民可也乃走潁亳說  
其軍帥曰民罹虐政不得已起爲亂矣當思有以靖

之虔劉人以逞所謂如水益深如火益熱者也軍帥聞其言以爲才交薦之擢萬夫長五轉至工部尚書非其所好也當是時盜稱名字者皆烏合之衆散漫無統所經之處唯務焚掠千里爲墟濂度必無所成謂所親曰區區豈從戎哉奮不顧身出編虎鬚者志欲生烝民也今若是猶魚游釜中耳竈火已燃尚自謂得計耶吾聞真主已建都金陵寬仁愛人四方之民爭引領望之不去禍將及於是乘間挈家南渡召見於青龍殿與語大悅會新設執法議理司方將選人以授遂詔爲執法官濂乃悉心詳讞務協厥中人

稱平允丹陽令白齊因公致罪當棄市濂以情可矜  
恕敷奏 上前得貸死知應天府王子謙坐事械繫  
者久濂惜其材議從末減由是 上深簡注之陞為  
中書員外郎遷提刑按察司僉事階奉訓大夫巡行  
郡縣見貪墨蠹民者必擊去之唯恐弗亟餘則務存  
大體觀風宣化而已一日天大風晝晦 上下詔求  
直言濂歷述災傷病民竟為之罷徵俄得末疾家居  
者久之洪武三年卒於京城之寓舍壽五十有七濂  
篤學好古凡法帖名畫多能鑒定且善虞世南書軀  
幹昂聳而容貌潤澤恂恂儒者也或與之論議天下

大計輒掀目吐氣指方畫圓袞袞數千言不休臨大  
事之際神采精緊毅然有不可奪之氣復面折不少  
恕性慈惠遇凍餒者如身受其病輟粟帛濟之乃已  
其在戎行務以不殺爲勸且導人辟兵之方賴以生  
者數百人至於事親盡孝奉意承顏唯恐毛髮有違  
故鄉邦尤稱之咸曰孝如王習古庶幾無媿於古人  
云

唐 鐸

唐鐸鳳陽人庚子從征江州授西安縣丞以至太子  
少保二十八年使龍州諭趙宗壽還復出叅議總兵

楊文軍事經畫守衛撫輯蠻獠鐸重厚不妄取予

上初起兵卽侍左右每以故舊遇之僚屬罪數連及

上念其篤行皆不問時諸卿中詹徽以才勝鐸以

德勝 上嘗曰都御史詹徽刑部掌部唐鐸二人性

行不同下人事之亦異徽剛斷嫉惡不容奸僞役吏

髮蓬面垢容愁肌瘦不異羈囚鐸始友繼臣至今三

十四載交不知變色口不出惡聲德有餘而才不足

屢被小人誣誤極刑者數矣朕深知其德曲宥弗罪

奸人忌徽剛則謗訕滿朝鐸重厚無疵然一切文移

計稟皆無文弄法鐸無奈何夫聰明決斷者以爲非

淵德海涵者以爲愚人心之不古有若此耶三十年  
卒年六十九卹賻最優

李敏

李敏鳳陽府潁州人吳元年辟舉人材入見稱 旨  
洪武元年擢撫州知府守廉燭理雖庶務煩劇決之  
如流六年陞工部尚書七年六月敏同太常寺唐鐸  
少卿樂禮侍奉天門 上諭以 宗廟祭器如式造  
辦本年冬出爲江西行省叅知政事九年復召爲工  
部尚書與薛祥迭任賜以江西田土本年以疾卒於  
官遣官祭葬

沐春

沐春字景泰定遠人考黔寧昭靖王總兵西征咸著  
勲烈命復故姓頒賜鐵券爵西平侯食祿二千五百  
石子孫世襲及薨春嗣爵春生未朞適母夫人喪鞠  
於外祖氏長歸就學洪武己未十有九歲卽侍父征  
西番洮州擒元三副使明年從征亦集乃擒國公脫  
火赤等歸又明年從征雲南歷功先士卒十六年還  
京師遂掌禁旅冬江西寇僭號順天王煽諸郡作亂  
春與征焉獨冒矢石奮勇先登殲之明年師還初天  
兵旣平雲南留英鎮守凡有機密重務輒遣春上聞

一歲之內馳驛再三所報悉稱旨十八年秋授驃騎將軍僉後軍都督府事廷臣請試職上曰是兒我家人非他比也畀實授後軍轄幅員之北視他府爲劇春割決如流事無壅滯是年冬繫天下重罪於烈山錄而詢之奏釋數百人十九年蔚州民告變那海等構逆上命春馳驛往至則巡城厲士襲而捕之推校得實白其誣枉上悉恩宥又全活數百人二十年春從征虜大將軍宋國公帥師三十萬北出沙漠勦元之餘孽未庭者次金山降其署丞相納哈出

平朝京師春爲護送二十五年六月父英薨於雲南

春往奔喪十月奉柩還葬哀毀盡禮尋有詔起春襲爵繼任奉勅鎮守雲南凡雲南各衛軍馬悉聽節制至鎮則宣上德意發號令修戎撫民柔遠懷邇無改於父之道又整飭屯政較多寡之入以嚴賞罰稽功乃倍餉饋以足二十六年春緬酋和泥祿谷爲邊患遣兵控禦之羅雄法束嘯聚命都督何福討降之東川酋弗靖奏復攝賽爲知府境遂寧謐秋維摩阿的等一十寨諸酋拒命調都督瞿能平其地俘斬無算獲馬牛羊倍之遂誓服不敢携二十七年春西番蠻邊出沒北勝浪渠州春潛遣百戶蘭宗賢輕騎而往

集民兵伏其要路覆擒斬甚衆請立瀾滄衛以鎮其地秋施甸蒲阿董等衆犯永昌境命指揮使胡淵乘間出奇襲殺首賊衆遂披靡先是越州蠻龍海子阿資據龍窩縱殺掠累爲民害 朝廷命諸將率兵數萬征之師無功自後無敢議伐者春復討之進兵紫溪山集衆謀曰歷年不獲此寇者彼恃其地多險阻及各處土酋皆姻婭得亡匿今調土酋悉從征設謀羈絆俾不能通復多置營堡相犄角制其出入授首必矣乃分駐陳寧逼之二十八年兵至赤窩果獲阿資屍諸市及誅同惡等二百人越州平阿資素爲桀

黠至是捷聞 上嘉獎之衆亦歎服冬廣南酋儂真  
佑阻兵負固調都指揮王俊征之盡殪其衆俘斬無  
數廣南通明年順寧酋猛丘結外夷雲龍酋段羌納  
逋逃皆蓄異志遣大理衛指揮使鄭祥往討猛丘懼  
而斃羌伏誅改立寧遠州右爲七十城交趾恃險遠  
肆強獷復命何福率兵一戰蠻臺江擒殺男婦二千  
有奇盡獲其軍實酋刀拜爛始懼乞降奏復其官麓  
川宣慰思倫發先酬於酒其下多怨三十年春刀干  
孟弄兵謀逐其主以自立思倫發窮奔告援春與之  
入朝面受 宸算以歸三十二年永寧酋賈哈刺寇

邊調何福擒之戮其脇從餘黨悉潰三月春以思倫發之告駐師怒江諭刀于孟釋兵不聽四月乃遣何福瞿能率勁卒八千銜枚倍道直擣其寨渠魁乘象突出追射殺之遂奮兵縱擊大破其衆捷聞朝廷授以征虜前軍印命總四川貴州雲南各道兵欲盡平其地時春已得疾猶竭誠殫思未嘗告憊將以秋復征而遂不起矣九月甲申夜卒有大星自東墜西其聲如雷衆咸見聞隨薨享年三十有六訃聞賜祭葬謚惠襄

李默

李默定遠縣人洪武丙子鄉薦授上饒諭視躬稼介  
課士勤嚴人以李夫子稱之未樂中上書言時政擢  
漢府左長史漢王陰蓄異志苦口極諫章疏凡數十  
上王怒而錮之天討既加府寮皆被罪而默諫章  
尚存特旨赦之縉紳士夫咸狀其節

王 弼

王弼鳳陽府定遠人膽畧過人號雙刀王初結鄉里  
依三臺山樹柵相保丙申率部下來歸脩宿衛克池  
州石埭婺源授元帥下蘭谿金華諸暨紹興援池州  
復太原攻武昌大戰鄱陽截擊禁江口平武昌還收

廬江援安豐破襄陽安陸還取淮東克舊館湖州陞  
指揮使圍蘇州軍盤門士誠被圍久突出轉戰盤門  
欲奔常將軍分兵北濠截其後遣兵與戰戰良久未  
決常將軍拊弼背曰軍中皆稱爾猛將能爲我取此  
乎弼卽馳鐵騎揮雙刀奮擊却敵常將軍乘之吳兵  
大敗人馬溺死沙盆潭甚衆士誠馬驚墮水幾不免  
肩輿奔入城吳平從征中原下山東河南北遂克元  
都保定從中山王進兵太原自河中渡取陝西兵至  
察罕腦兒及紅羅斷頭口進僉督府事討西番獲馬  
牛羊駝二十二萬班師洪武十二年封定遠侯食祿

二千石世指揮使從征雲南功與世侯券加祿五百石爲副將軍征大寧東出遼東征納哈二十二年詔功臣還鄉二十七年卒

耿 璫

耿璫鳳陽府濠人長興侯炳文仲子官至後軍都督僉事靖難兵起與江陰侯吳高及楊文率遼東兵圍永平不克退保山海關吳高被間奪兵徙廣西楊文守遼璫數請攻永平以動北平文不聽靖難後璫論死

李 芳

李芳字彥芳穎上縣人登永樂中進士選庶吉士改  
刑科給事中執法不撓常䟽時事忤權倖謫海鹽丞  
棄官家居詩酒娛適 宣宗嘗顧問曰李芳何在然  
近倖畏其剛正多沮之者京師爲之語曰永樂紀綱  
宣德李芳萬鎰之璞百鍊之剛用雖未究亦名重朝  
野矣

卜謙

卜謙字伯讓穎上縣人永樂中領鄉薦卒業大學時  
成祖勅國子監選才識老成者從侍東宮講讀尋授  
工科給事十五年扈從 皇太孫南京監國朝夕獻

替每以魏徵自期節丁內外艱歸 宣宗馭極垂念  
舊臣差行人取回京直文華殿日承顧問常陳十事  
上特嘉納已陞山東副使見忤近倖謫山西叅議因  
足疾自陳致仕別城隍詩有去時還是舊時貧之句  
里居爲百孝歌以教族黨子弟

人物考卷之十六目錄

南直隸鳳陽府三

徐輝祖

孫岳

小馬王

宋晟

沐晟

附于琮 孫崑

李彬

韓觀

陳亨

朱能

陳懋

張貫

金純

朱勇

苗衷

許亨

本朝京省人物考卷十六

南直隸鳳陽府

三

徐輝祖

徐輝祖初名允恭鳳陽人父曰中山武寧王達首佐高皇帝定天下出入將相勛德爲諸功臣冠配饗廟廷輝生而白皙秀眉豐下及長長八尺五寸顧盼有神舉止端嚴雅肖中山王數鎮北平留宿衛御家衆肅然上故心器之命理左軍都督府月廩祿二十石未幾而中山王自北平還疽發于背有間

上命輝祖奉手詔道迎俄而王薨又三年而爲洪

武已巳始命襲爵魏國公賜誥明年賜黃金三百兩  
白金二千兩鈔三千錠文綺三十疋綾十疋俾還鳳  
陽賜第以歲時入覲尋給兵百二十人爲衛復賜鈔  
四百錠明年出陝西防邊自是歲出練山東河南兵  
馬仍于太倉支歲所受祿五千石而還田于官時故  
元降將阿魯帖木兒乃兒不花與其部衆隸燕王  
軍中有異志爲告者所發上密詔命輝祖誦其實  
其姊氏爲燕藩正妃是爲仁孝文皇后輝祖至悉  
得其實併其黨與悉捕送闕下戮之二十九年國  
子學正吳啓言國子師生日黻不爲甄別高下無以

懲勸 上命輝祖帥禮部翰林院臣詣監試其文稅  
分別送吏部銓用 高皇帝崩 皇太孫卽位時諸  
宿將且盡輝祖與曹國公李景隆俱以肺腑領朝班  
值 文皇帝入臨稱疾不拜王屬尊而功高有武畧  
擁強兵 朝議憚之會王歸而留次子高陽王待命  
于邸輝祖力勸上留之且言高煦勇悍無賴倚騎射  
能寧惟叛主亦將叛父時輝祖弟增壽力保無他遣  
之瀕行煦入輝祖廐中竊善馬歸燕晨白之 上亡  
何燕師起以誅君側爲名諸徹侯兵往攻之相繼敗  
始議置大將時景隆有聲公卿間而輝祖以戚屬見

左故景隆將兵而以輝祖城守後景隆與歷城侯相繼敗燕師日迫矣其世子高陽王陰餌輝祖爲內應確然不撓及師攻金川門猶與常開公昇等分道出大戰皆不利京師悉爲燕輝祖獨守其先祠不從勸進于是錮之私第尋逮下獄久之竟不屈以死年僅四十餘久之上念中山王功大召子欽予故封還其舊所削祿及廬產未幾欽乞守墓上怒謫居中都嘉靖初年詔悉錄爲建文君死事者各以官稱廟祀之金陵而輝祖居首

孫岳

孫岳洪武中從大將立功官至都督同知建文中充  
鳳陽守將靖難兵起大修戰守器械撤寺材爲戰艦  
樓櫓戈甲咸有法式列寨淮西水陸有備靖難兵竟  
從下流渡淮至盱眙及金川門不守岳猶堅守中都  
永樂元年法司劾岳逮至京磔死

### 小馬王

王失其名每騎一小馬人遂呼爲小馬王世臨淮人  
從太祖征以戰功爲指揮使靖難兵起調從李景  
隆北征勇毅常陷陣出入無敢當者戰于白溝河敗  
績脫胄付其僕曰吾爲國死以此報家人乃慨然立

馬堅鎗而亡

宋 晟

宋晟字景暘世家鳳陽之定遠壬辰晟隨父朝用兄國興來歸 太祖明年從克濠州又從戰敗賈魯父兄並以功授萬戶甲午從張天祐克五河泗州盱眙又並進總管乙未從 上克和州渡江下采石太平總管邵榮等潛有異謀國興察知以聞榮等伏誅從克溧陽進攻南臺國興戰沒晟襲兄職丙申從攻陳也先水寨克之遂從克南臺朝用陞廣德元帥丁酉隨朝用克宣州還改朝用天寧翼元帥以老留建康

晟從鄧愈克徽州受功賞戊戌召入侍衛己亥襲天  
寧翼元帥職庚子調征饒州及江西諸郡以次平賜  
襲衣文綺 命充統兵官平諸山寨洪武元年克建  
寧遂留守禦新定官制實授武德將軍建寧衛正千  
戶四年陞懷遠將軍建寧都指揮同知冬 召還陞  
江西都指揮使九年調大同授龍虎將軍十一年調  
陝西所至治兵撫民不嚴而肅十二年掌涼州衛十  
三年逐北虜至白城獲其人馬甚衆十五年父病詔  
晟還侍又三年父沒旣襄事復鎮涼州虜時數爲邊  
患晟率兵討之追至亦集乃之地斬其兇渠餘悉生

繫送京師又招降虜僞國公吳把都等萬八千人送其酋長百五十人詣京師簡其壯者附卒伍餘悉處之善地俾耕牧自便驛召還京獎諭再四賜賚甚厚復鎮涼州十九年召還陞驃騎將軍右軍都督府都督僉事賜鈔文綺廿三年夏遣中使就賜文金及鈔至秋復三遣賜鈔文綺授制諭充總兵官征哈密里破之獲虜衆千三百人及金印一銀印二悉送京師所獲馬牛羊咸給將士二十五年復充總兵官征罕東西番叛寇誅禽七千五百餘人獲馬牛羊無筭還京師二十七年調中軍都督府是歲虜寇遼東命充

副總兵率兵討之遇戰腦溫江獲虜衆千餘馬倍之  
明年廣西併蒙諸寨連結爲亂命充右副總兵往征  
之誅擒七千餘人賊平還京又明年總羽林八衛兵  
往平五開龍里十三洞之寇三十一年率師城萬全  
諸衛歸二年出鎮甘肅永樂元年授平羌將軍充總  
兵官仍鎮甘肅三年虜日益聚近邊遣人諭以朝  
廷德意其酋長率部衆來歸邊境底寧事聞賜勅獎  
諭命都督徐膺緒尚書趙犴持節卽軍中封西寧侯  
仍後軍都督府左都督食祿一千一百石加賜田若  
千頃又二年以疾終

沐晟

附子琮孫崑

沐晟字景茂定遠人自少氣宇閎厚端慤凝重聰悟過人而博學遠識恭慎寡言喜愠不形于色高皇帝重之既授後軍都督府僉事夙夜祗勤陞授左都督昭靖薨晟嗣封西平侯仍奉命鎮守雲南秉誠殫慮益弘遠圖威服德懷恪勵夙夜先是麓川不靖諸蠻逐宣慰使而分據其地奏發兵平之復奏以其地置孟養木邦孟定三府鎮沅威遠二州并五長官司而歲徵其賦又于潞江之西置騰衝千戶所以控制之夷遂帖息太宗臨御之三年八百蠻酋侵邊晟

遣將先率兵討之躬率親兵及蒙自縣蠻聞其不遂遁進擒其酋誅之事聞賜璽書白金四年安南叛命晟佩征夷副將軍印充左副將軍率雲南等都司兵與英國公張輔分道進討晟率兵由蒙自經野蒲斬木通道以入先遣偏裨攻集猛烈棚華關隘賊徒悉遁遂築堡駐兵造舟分遣諸將出宣光江口舟師夜出洮水泝流攻賊之富良江自旦鏖戰抵暮賊引却翼旦諸將咸欲奮擊晟曰受命弔伐所欲得兇渠數人而已縱殺非 皇上好生之心乃止遂造浮梁渡師時征夷將軍張輔大兵至乃合攻寇之多邦城柵

繼擣其東西二都及盤灘等寇悉破之寇首黎季犛父子狼狽棄其衆獨挈家屬遠遁于海晟合張輔兵追至日南州奇羅海口禽俘無遺械送京師凡得郡四十八縣百八十六戶三百十二萬五千九百獲象馬牛畜軍資器仗無筭安南平六年春班師入朝封黔國公食祿二千石賜誥券玉帶金幣命子孫世襲既大宴上親製詩褒嘉又日賜宴于便殿還鎮雲南是冬安南餘寇携二復命佩征夷將軍印總兵討之王師壓境寇遁入乂安海島追至占城之境禽寇首陳季擴等檻送京師誅之師還仍鎮雲南十七年

富州蠻酋積逋賦不入命晟發雲南貴州兵討之蠻據險以抗晟遣兵斷其後諸將請急攻晟曰威服不若德服遂使人諭以禍福蠻卽遣子詣京師謝罪悉償所逋 仁宗嗣位詔兼太傅召至恩禮加厚遂命佩征南將軍印還鎮宣德初遣使齎璽書金幣勞之正統賜金幣加厚是年冬四川會川黎溪蠻合底泊等爲亂奏遣弟都督昂討平之二年冬馬龍他郎甸蠻不靖復奏遣昂平之三年麓川思任發擾邊遣人諭之不下奏躬率兵討之兵至路江先遣人諭之不下乃命弟昂及都督方政等率兵前進晟整兵繼其

後政等夜渡江破賊柵賊衆奔北官軍乘勢追至景  
罕等寨斬首三千餘級政奮勇獨進賊伏兵四發政  
力戰死之時春已半晟慮瘴發將不利于官軍遂旋  
師駐金齒會有旨命晟還鎮行至楚雄得疾遂薨謚  
忠敬子斌初侍祖妣居金陵正統乙丑襲封黔國公  
掛征南將軍印繼撫其地麓川不靖王驥總兵討之  
以斌爲後拒令于騰衝南甸間操練土著遙振軍威  
賊罕遠鎮是年貴州苗民圍城劫屯所過殘戮廼遴  
委鄒楫揮劉玉率輕騎兼程救之賊勢披靡普定等  
衛賴以安全天順初年遣行人黃裳奉勅褒嘉特賜

銀幣斌謙抑純謹奉職克虔尋以疾薨年五十有四  
謚榮康當榮康告薨之時子琮甫襁褓耳以從兄璘  
繼撫璘卒琮尚幼璘弟瓚嗣兄職而琮以成化乙酉  
嗣黔國爵命還鎮雲南琮英敏過人端勤有守苞苴  
不敢及門諳武經諸家兵法及陰符奇門諸書戊戌  
尋甸土官安晟卒弟倘謀殺其子瑄圖襲兄職遣兵  
擒倘聞于朝明正其罪廣西府土官昂貴殘暴虐  
民抗拒官司動相仇殺委官擒捕奏請革其爵秩銓  
流官以治之開設學校教之禮義民始安焉馬隆麗  
江等處蠻夷弗率量遣官軍以次掃定石屏州蠻賊

聚衆搶虜勢漸猖獗命都指揮吳瑤等調漢土官軍  
征之格殺首賊殘孽潰散民免于擾己亥復擒斬箐  
赤石崖等賊請添設大羅衛兵川州以撫寧其地

朝廷從之褒嘉其功遣使賜以盛甲文綺壬寅奉

勅偕都御史程琮往撫孟密所過州縣秋毫無擾癸  
卯橋甸賊聚衆倡亂安寧鎮十數州邑咸被其害命  
都指揮趙晟等調漢土官軍分道進攻俘獲無筭捷  
聞加授太子太傅乙巳南窩蒲賊負固距險騷亂永  
昌等處再遣趙晟督兵以往一境悉平復有白金文  
綺之賜以弘治丙辰卒于鎮得年四十有七無子以

故錦衣衛都指揮沐誠之子崑仍襲黔封佩印鎮守  
崑亦能克繼世緒廉靜不苛簡閱士卒繕治城守庚  
申統兵勦龜山竹子箐等處寇平而人不擾壬戌偕  
都御史會貴州守臣合兵討普安等處蠻寇首惡就  
戮餘黨悉平正德辛未安南長官司相繼煽亂流劫  
郡邑崑次第勦平先後事聞降勅褒諭者三加歲祿  
至百石者再賜白金文綺者五丙子加太子太傅己  
卯以疾卒年三十有八耳琮謚武僖崑謚莊襄

李彬

李彬字質文鳳陽定遠人父信有材畧勇銳絕人從

太祖起淮甸平天下積功至濟州衛指揮僉事洪武己巳以老謝事彬代之時年二十九磊落有大志辛未率所部兵從穎國公征北虜歷朶顏鴉山追襲虜酋阿剌失里至洮兒河身先士卒多所擒獲復歷黑嶺寒山及黑松林熊皮山追襲虜酋兀刺罕擒獲有加 太宗居潛聞其驍雄召見與語奇之遂隆眷注明年遣巡視宣府沿邊諸城起信爲遼東都司都指揮使癸酉遣相度宣府城基明年率兵築之并築德勝口城乙亥又築萬全保安城明年征哨泥河營黑松林至哈刺還駐兵廣昌己卯靖難兵舉彬爲前

鋒首率兵攻克薊州遵化進指揮同知繼攻克雄縣  
漢州進都指揮僉事已而戰真定拔永平取廣昌明  
午鏖戰白溝攻濟南累樹奇勳進都指揮同知其冬  
破滄州明年斫敵單橋擊衆藁城追奪順德畧地定  
州勳績愈懋進五軍都督僉事冬戰楊村被傷上

亟遣醫療治賜藥物俾還北平彬願力疾隨軍自效  
上嘉其忠勇壬午上渡江正位宸極命護中官

至京念其勞績居多癸未永樂改元定功行賞封豐  
城侯食祿一千石子孫世襲錫以誥券甲申夏鎮守  
江西秋召還明年送趙王赴北京還往捕阜君山寇

丙戌南征交趾 命充左叅將有白金文綺之賜率  
師入境水陸夾攻直擣賊巢擒獲魁黨俘獻于朝悉  
平其地戊子凱還加祿米五百石尋命勦平東海倭  
寇明年總督操江尋往長河擒賊李法良械京庚寅  
勦捕福建海寇頻年爲國墾菑除害耘鋤海內不避  
險艱 上深嘉獎錫予稠疊一時將臣無與爲匹壬  
辰佩征虜前將軍印 命充總兵官鎮守甘肅有白  
金文綺寶鏹之錫至鎮振揚威武邊塵清肅甲午召  
還扈蹕北征故虜明年鎮守陝西丙申召還扈蹕還  
京尋佩征夷將軍印 命充總兵官鎮守交趾在鎮

七年遠人畏威懷德莫不帖伏境宇寧謐壬寅年六  
十二卒于位交人相向號哭如喪所親訃聞上厚  
加賻贈勅有司歸其喪遣官諭祭賜塋追封茂國公  
謚剛毅

韓觀

韓觀字彥賓鳳陽虹縣人父成事高皇帝爲帳前  
總制鄱湖之戰歿于王事追封高陽侯觀襲爲廣西  
衛指揮僉事陞廣西都指揮使觀生長兵間諳練武  
事爲人勁悍嚴刻在鎮申飭紀律軍中無敢違令者  
初蠻寇不靖數出焚劫郡縣殺守吏邊民苦之命觀

勦捕觀獲寇必治以峻刑間宥一二遣歸諸蠻聞觀用刑皆膽落不敢復出爲害由是境內得安後召還京陞右軍都督同知無幾命充左副總兵征五開上卽位以觀舊臣拜征南將軍鎮江西數月復鎮廣西永樂四年從征交趾與効勞績九年復命鎮交趾至十二年卒賜祭賻以粟帛無嗣

陳亨

陳亨鳳陽壽州人生而奇偉有大志元季爲揚州萬戶時高皇帝龍飛濠梁歲丁酉仗策叩軍門上謁高皇帝奇之選爲鐵甲長從大將常公征泰州破

張士誠軍獲乘馬而還戊戌冬從車駕攻婺州拔其月城陷陣先登有銀器金幣之賜以驍勇聞從征定浙東諸郡洎征安慶太平高郵皆效勞績壬寅春攻陳友諒于鄱陽亨以功擢鐵甲百戶癸卯再舉師次湖口亨言于主帥曰陳氏兵多土人熟于水道今方秋湖水尚盛中多灘磧或爲所誘則我舟膠淺難以大逞莫若募其土人潛遣小舟察其淺深險易量勢而進斯可濟也主帥用其言以聞如其計大敗陳友諒兵甲辰實授天策衛管軍百戶隨大將定江北諸郡縣吳元年以平浙西取蘇州功陞崑山衛千戶

階武德將軍繼從丞相徐公北定中原取東昌以亨  
爲副指揮守之值元兵數萬猝至城下衆倉皇失措  
亨曰敵衆甚銳利速戰難與爭鋒當以計破之于是  
堅壁不與戰越二日亨先以兵數百誘之敵見人寡  
悉力來攻亨率大軍奮擊且出奇兵邀之敵遂敗追  
奔至棠邑僵屍載路獲人馬輜重無筭亨亦身被十  
數創已而徐公復選亨攻元都克之追元兵出塞而  
還遂從攻幽燕諸城未下者洪武己酉調守大同攻  
王保保魏伯章俱有功己又征和林應州天城白登  
甲寅破詹童軍生擒僞官劉平章乙卯擢燕山左衛

指揮僉事是後累征迤北遼陽破滅管帳綏輯降附  
威聲遠著戊辰冬以守禦邊陲久效勞績特陞驃騎  
將軍北平行都司指揮使亨感 上知遇益以邊務  
爲任功烈之茂一時邊將罕與爲儷歲戊寅陞後軍  
都督僉事仍掌行都司事己卯靖難兵至大寧召亨  
見軍門賜坐親酌卮酒勞之問以安社稷計亨奏稱  
旨乃曰天以卿授吾其遂成吾志于是命爲五軍總  
兵官南進至鄭村壩首與敵遇卽摧敗之從攻廣昌  
蔚州大同諸郡無不克捷庚辰夏四月戰白溝河下  
濟南茂建奇策敵聞亨名不戰自退勅書褒諭陞都

督同知未幾嬰疾在營 文皇帝憂念不置晝遣中使絡繹往問夜則就營察視安否醫藥飲食皆出

上賜疾篤命還北京 文皇尋亦旋師親幸其第臨

問者二獨以用賢厚賞爲勸嘉納之遂以是年卒于正寢訃聞悼慟不勝遣官諭祭者七喪葬之費悉出內帑 文皇帝旣登大寶錄序前勞定議追封涇國公謚襄敏亨爲將四十年仁而廉他將或以多殺戮爲功橫取子女玉帛輒語之曰好生惡死人人所同奚忍害彼之命爲已功也父子夫婦人倫至重又奚忍獨人之父鰥人之夫而奄有其妻子耶于是聞言

而化者甚衆人以爲有古良將風云

朱能

朱能字士弘世家鳳陽之懷遠父亮從太祖征伐  
有功累陞燕山護衛副千戶能有令質自少喜讀書  
事父母至孝洪武甲戌襲父職事文皇帝于藩邸  
小心慎恭未嘗少懈爲上所信任旦夕侍不去側  
靖難師興帷幄密議惟河間忠武王與能預焉時北  
平三司之交構造禍者能與忠武建議率麾下首擒  
之遂奪城九門撫綏城內外三日人以大定引兵攻  
薊州擒其將都指揮馬宣等遂取遵化永平密雲從

上攻灤河既還從克雄縣首破其東門敵衆敗走  
追及于月漾橋執其總帥都督楊松潘忠等復追餘  
衆于漠州斬獲不可數計乘勝長驅入真定大敗長  
興侯耿炳文兵追奔至滹沱河炳文衆尚數萬復列  
陣以戰能奮勇大呼衝入敵陣敵衆自相蹂躪死者  
無筭棄甲來降者三千餘人 上大悅賜書褒諭永  
平馳報江陰侯吳高以遼東兵攻城急能從 上赴  
援高遁走遂從定太寧戮其拒命撫輯其衆而還時  
曹國公李景隆率兵攻北平能從 上至鄭村埧與  
景隆兵遇大戰敗之進攻其營又敗之景隆兵列營

九門者連敗之城中亦出兵夾擊景隆狼狽俱走從  
攻廣昌蔚州大同次第悉下景隆復收潰散之卒號  
百萬來攻 上親拒之能爲前鋒午至白溝河敗其  
都指揮平安軍及申又與敵兵戰大敗之明日能領  
左哨當前鋒又大敗敵兵盡克其砦柵敵走保濟南  
能率衆追之至鐔山敵嚴兵列陣以待連破之敵衆  
釋兵降者萬餘人能以聞 上悉撫而縱之已從攻  
滄州先破其東門入城斬首六萬餘級敵震懼遂獲  
其總帥徐凱進攻東昌敵列陣決戰 上以數千騎  
出陣後敵圍 上數匝能奮力翼 上以出進戰夾

河能爲奇兵先鋒大敗將盛庸兵又敗平安兵于藁城追奔至真定戰其東門斬首萬餘級遂略彰德及定州勦西水寨已而敗敵將李文于德州遂克東阿東平破汶上諸寨設伏泲河敗平安兵十餘萬小河爲敵所乘稍却諸將遽請旋師獨力勸上行曰用兵未必常勝豈可因小挫輒自沮挫但當以宗社爲重整兵前進耳上撫掌嘆曰爾言深合吾心遂行至靈璧敵盛兵迎戰能先登陷陣大敗之生擒其副總兵陳暉平安叅將馬溥徐真及都指揮三十餘人獲馬二萬敵衆死者屍蔽原野降者十萬人悉縱遣

之進克泗州渡淮敗盛庸兵遂克盱眙下揚州從

上渡江入京師內難平 上承大統論靖難功晉封

成國公食祿三千五百石子孫世襲賜誥券永樂二  
年命兼太子太傅四年安南黎季犛弑其國主毒虐  
下人拒遏詔使數諭弗悛遂發兵討罪命能總兵佩  
征夷大將軍印率左右副將軍左右叅將及神機橫  
海驍騎遊擊鷹揚五將軍兵八十萬討之臨行 上

親送之龍江師至廣西 上顧侍臣曰朕夜察天象

西師有憂其朱能乎然能足辦斯事朕第慮氣候非  
其所習耳踰旬訃聞 上震悼輟視朝五日 上灑

泣曰方艱難時協力一心相濟能其首也且其素存  
心行事皆應遠到曷遽止此言已益酸楚左右皆流  
泣莫敢仰視春秋三十有七耳 上親爲文祭之賻  
卹特厚追封東平郡王賜謚武烈後配享 太宗廟  
廷

陳懋

陳懋字舜卿鳳陽壽州人父亨洪武三十二年從  
太宗文皇帝靖內難以功進都督同知卒追封涇國  
公謚襄敏懋器宇宏遠識見超卓負膽氣工騎射年  
弱冠卽從父領兵爲前行凡填上廣昌蔚州大同白

溝濟南之戰與父同功又禦敵于單橋藁城西寨東  
平州鎮小河戰尤力累陞右都督永樂初論功行賞  
進封寧陽伯食祿一千石子孫世襲賜誥券賚予甚  
厚六年受 詔佩征西將軍印總兵鎮守寧夏賜寶  
鏢白粲牛羊以爲戒嚴之費至鎮號令一新凡胡人  
降附者親撫綏之務得其歡心七年自將精銳大敗  
虜于境外由是殘孽遠遁邊塵肅清捷聞加封寧陽  
侯食祿一千三百石子孫世襲復賜誥券及貂蟬冠  
服錦綺寶鏢八年春 上親征北虜將左掖兵扈從  
十一年冬還鎮十二年春 上復親征仍將左軍俘

馘甚衆明年還鎮十四年夏有報虜酋馬哈木死者  
懋曰是欲懈我邊備也卽申飭諸將固守已而虜將  
果來見有備而退二十年春 上復北征率所部兵

以從還京賜玉帶金綺龍衣禮聘其女入宮冊封麗  
妃尋 命歸寧父母賚予駢蕃當世無與爲比二十

一年 詔統陝西寧夏甘肅三鎮兵出勦叛虜懋率

衆直抵賀蘭山擣其巢穴盡收其酋長十部落及其  
牛馬駝羊數萬凱還 上大悅寵賚有加二十二年

復隨上北征師還以懋兵爲殿至京遂領前軍都督

府事 宗登極以勦賊有勞加太保復官其長子

昭爲勛衛樂安州之平領京營兵衛 上有功還有  
金帛人口之賜二年復鎮寧夏三年春奏徙靈州城  
以便防守四年春得玄白二兔以進 上賜璽書獎  
諭兼有玉帶龍衣馬圖之賚六年還京十年 命佩  
平羗將軍印移鎮甘肅正統改元念助戚之舊召還  
奉朝請十三年冬福建民鄧茂七作亂僞稱閩王勢  
甚猖獗 命率師往討之至浙江有欲分兵先守海  
口者懋曰如此是絕其生路則爲死寇矣不從明春  
師次寧建有欲屠沙尤二縣者懋曰如此則益堅賊  
心矣乃下令諭之俾各復業能斬賊首者官與王師

同于是降者日衆曰賊勢已孤無能爲也乃五路進兵一鼓而收之凱還賞勞加等命領中軍都督府事尋兼領宗人府事景泰中加太子太師天順改元恩遇益隆六年春忽得疾踰秋不能起上言臣老死不足惜惟陛下以生民爲念任賢用能以圖太平之治則國家幸甚遂薨時享年八十有五訃聞上震悼輟視朝一日追封濬國公謚武靖遣官諭祭加賻及營塋事東宮及諸王亦各致祭懋偉觀修髯語音洪亮胸懷磊落敬禮文士雖位極人臣未嘗妄自尊大而南征北伐口不言功當爲中興名將稱首

張貫

張貫靈璧縣人洪武末年出歲貢入大學永樂中任順天府知府十年三月陞府爲京兆府卽以貫爲本府府尹政尚寬平獄無留滯吏民愛之稱爲長者十年卒于官

金純

金純字德修鳳陽泗州人洪武中歲貢入大學三十年吏部尚書杜澤愛其才薦擢吏部文選司郎中持衡公平能聲益著三十一年出陞江西右叅政值久雨江水泛濫民多勞饑多方賑恤民賴全活壬午

成祖入正大統吏部尚書蹇義首荐之召爲刑部右侍郎時將營北京命往湖廣採大木規畫綜計杜絕侵漁于是各郡不聞騷擾之苦而事亦易集還京甚荷 成祖眷注七年扈車駕巡狩北京八年北征又命扈從五月至驢胸河稍逼賊境凡居中翊贊効勞居多胡寇平扈還南京陞刑部左侍郎九年命看視河勢先是 高皇帝用兵梁晉使徐達開場場口入泗以通運道後因河口壅淤乃修師家莊諸閘又開濟寧州西坡接引曹鄆黃河水以通梁晉之粟後故道復塞至是命純開濬自開封府城北引水下達

鄆城復入魚臺塌場口出穀亭北千里修復故事今  
所謂永通廣運二閘是也十年回京十四年改禮部  
左侍郎尋陞禮部尚書時禮部有呂震掌部事凡一  
切大典禮俱命純攝行之十五年又扈巡北京于行  
在諸典制俱諳習切中事宜十六年扈還南京十八  
年又扈從行在十九年定鼎北京奉 勅巡撫四川  
考察官吏安輯軍民蜀人無擾事竣還京與尚書呂  
震協理部事雖震有柔佞才而純以誠心處之終無  
間阻二十二年改工部尚書本年冬改行在刑部尚  
書時干戈甫息天下又安純亦比情孚律務存寬厚

每戒屬吏不妄椎擊繩人以故諸司亦習爲寬厚故  
獄無瘦死者宣德十年致仕卒贈山陽伯

朱勇

朱勇字惟貞成國公能之子也能征安南沒于軍勇  
襲公爵勇自幼岐嶷不與凡伍出就外傳無統毅豪  
奢之習惟澹泊自處與韋布之士同讀書不事尋章  
摘句必求其要領于忠孝之大義利之微辨之弗明  
弗措主師席者爲之擊節驗其所履殆無違焉爵旣  
在躬恭勤益倍無一毫驕態見于言面而敦厚簡靜  
之譽籍甚文廟大異之日加眷注巡狩北京扈蹕

往來歷掌帥府留守南京蓋老成可託故委以心腹也勇握兵權號令不繁訓練有法不怒而威時仁廟監國尤見禮重十八年命勇隨侍北京二十二年從駕往征北虜有勞績及仁廟繼承大統眷顧益隆賞賚優渥勇獨加焉未幾宣廟嗣位以勇勲舊恩典頻繁白金文綺之賜極厚宣德初宗室有謀爲不軌者京師震動勇勸上親率六師以征之罪人旣得乃班師還京而運贊之功在勇爲多于是白金楮幣人口之賚又加隆焉三年隨上北征沙漠有功加太子太保特命總管大營兵權勇益殫心極慮

務精訓練兵威大震 上深倚重嘗御製重陽歌揮  
宸翰賜之五年勇以南北兩京及沿海陝西諸軍操  
備漕運遠近相乖請以南軍漕運北軍操備沿海陝  
西諸軍還營操守 上從之人以爲便自是每歲巡  
邊謁陵必命勇綜理其務屢有金綺之賚六年冬至  
以京軍分調大同一帶防守者多進言恐非居重御  
輕之意 上以爲然乃命兵部選精兵六十萬以益  
之七年 上慮勳臣子孫過于優逸後不堪事于是  
屬勇督練之時萬全諸軍勞民供餉勇進屯種之計  
以息轉運又言減放宣府調操者及留宣府諸軍備

遼者悉准行之九年扈從巡邊慨然欲選將士抵其巢穴以勦絕胡虜會阿魯台部落離散相率效順遂還勇宿衛禁闈防範嚴密金綺幣楮之賜尤侈勇愈感激竭誠輔導兼知經筵事每偕儒臣進講以成聖學勇以爲天下雖安不可忘戰復奏選銳兵四萬以備邊用正統改元加授特進榮祿大夫右柱國九年邊報有警勇統兵出喜峯口敗虜寇于富峪川追及熱水川俘獲人口馬駝牛羊還以功進太保復賜蟒襲并介冑十四年虜寇犯邊勇復領兵隨駕往討之還至土木兵潰勇力戰以死得年五十有九天順改

元賜勇誥命追封平陰王謚武愍子儀襲爵

苗 衷

苗衷字秉彛鳳陽府定遠縣人學術醇正舉應天鄉試永樂己丑會試中式時車駕巡狩北京詔中式舉人陳燧等八十四人寄監讀書越辛卯車駕還京廷試擢衷第二名宴于會同館授翰林院編修屢典文衡宣德五年預修實錄成陞侍講正統元年内閣楊士奇薦衷學問貫通言行端正與高穀馬愉曹鼐同侍經筵三年與修實錄成陞侍讀學士壬戌命主考會試得人爲盛十年陞兵部侍郎兼侍讀學士入内

開十四年陞兵部尚書兼翰林院學士景泰元年兩  
京多災衷與首相陳循等上疏自劾 景皇悉留之  
未幾衷乞致仕特賜寶鑑金綺給舟以歸未幾卒于  
家壽八十贈少保謚文康蔭子鏞爲御史

許亨

許亨字士通世家鳳陽定遠父得從 太祖起淮甸  
以功累遷都指揮僉事洪武丙子亨以父蔭爲燕山  
右護衛指揮僉事己卯調開平備禦己而還京調廣  
武 太宗靖難兵至維揚亨來見 上嘉勞之遂拜  
都指揮僉事賜之緣幣鞍馬命守和州未幾俾任北

平都司事撫馭有方士民安之歲庚寅受命董治長陵經畫措理得宜人樂趨事而忘其勞 上嘉其能

進都指揮同知是冬調掌金吾右衛事仍董前役先後凡八年勞績爲多丁酉進都指揮使出鎮浙江浙東南巨鎮海寇時或竊發至則擇人守屯堡時訓練寇遂屏迹居民以寧歲調兵士漕運給京師分番更代私不容髮以是勞逸均而餽餉及期至于繕治城郭堅甲利兵戒飭軍士毋爲民擾尤悉其心故兵民相安而市井晏如也 英宗嗣位以享歷事累朝克效忠勤特遣使賜以勅書白金文綺拜左軍都督僉

事仍掌浙江都司事亨益感 上恩務殫厥職比累  
陳年老乞致仕 上以耆舊精力未衰不允所請正  
統戊午以疾卒于官享年七十有四訃聞遣官諭祭  
仍勅有司治喪營事

本朝分省人物考卷十六終